

Mid-Day Dogri News Bulletin, 17th Feb. 2025

समे – 12:25

<><><><><><>

LG Jammu Aarti

लेफ्टिनेंट गवर्नर मनोज सिन्हा होरें मुकामी करोबारिएं, उद्यमिएं ते कम्मगारें दे विकास दी जरूरतै उप्पर जोर पांदे होई जम्मू दे चबक्खे विकास लेई अपने प्रशासन दी वचनबद्धता गी फही पक्का कीता ऐ। एह गल्ल उ'नें श्री रघुनाथ जी की जम्मू आरती च हिस्सा लेंदे होई आखी। इस मौके उप्पर एलजी होरें सरकार दिएं मुख्य पैहलकदमिएं उप्पर लोऽ पाई जि'दे च मुबारक मंडी थमां लेइयै रघुनाथ बजार तगर दे इलाके गी शैल स्नाकड़ा बनाना, आध्यात्मिक सैलसफा सर्किट विकसित करना ते खित्ते दिएं सैलानी ते धार्मिक थाहरें उप्पर उपलब्ध सुविधाएं च बाददा करना शामिल ऐ। पिच्छले 5एं ब'रें गी जम्मू लेई इक सनैहरी अवधि करार दिंदे होई एलजी होरें खित्ते दे विकास लेई लम्मी अवधि आहले नजरिये ते लोकें दी खुशहाली दी जरूरतै पर जोर पाया। उ'नें समाज दे सब्बनें तबकें गी गुजारिश कीती जे ओह बंड पोआने आहली ताकतें खलाफ इकजुट रौहन ते जम्मू गी आध्यात्मिक ते आर्थिक गतिविधिएं दा इक बड्डा केन्द्र बनान।

<><><><><><>

LG Amarnath Delegation

औंदी श्री अमरनाथ जी दी जात्तरा गी बवस्थित ढंगै'नै करोआना जकीनी बनाने लेई श्री अमरनाथजी जात्तरा भंडारा संगठन दे इक डेलीगेशनै कल लेफ्टिनेंट गवर्नर मनोज सिन्हा हुंदे'नै मलाटी कीती। अपने प्रधान राजन कपूर हुंदी अगुवाई हेठ गेदे इस डेलीगेशनै, लंगर संगठनें, मोबाईल संपर्क च सुधार करने ते कम्मै-काजै मतल्लक होरनें मामलें गी तेजिआ कन्नै तोढ़ चाढ़ने लेई तसदीक आहली प्रक्रिया कन्नै जुड़े दे केई सारे मामले एलजी हुंदे अगगे रखे। एलजी होरें डेलीगेशन गी जकीन दोआया जे इ'नें मामलें दे नबेड़े लेई पक्क गै लोड़चदी गैहीं पुटिटयां जाडन तांजे श्री अमरनाथ जी दी जात्तरा गी सुरक्षित ते बवस्थित ढंगै सिर तोढ़ चाढ़ेया जाई सकै। श्री अमरनाथ जी श्राईन बोर्ड दे मुख्य कार्जकारी अधिकारी डाक्टर मन्दीप के. भंडारी होरें बी इस बैठका च हिस्सा लैता।

<><><><><><>

LoC Poonch

पुंछ जिले दे गुलपुर सैक्टर च कब्ज़ा रेखा कश भारत दी इक चौकी पर पाकिस्तान आसेआ गोलीबारी कीती गई जेह्दा भारती बलें बी तुरत बनकदा परता दित्ता। आकाशवाणी दे जम्मू संवाददाता दी रिपोर्ट मूजब, भारती जवानें गी निशाना बनाने लेई पाकिस्तान दी तरफा स्नाईपर हमला कीता गेआ हा जेह्दे पर बनकदी कार्रवाई कीती गई। उ'आं अजें इब्बी साफ नेई होआ ऐ जे एह हमला पाकिस्तान फौज नै कीता हा जां फही जंगलें च घुसपैठ लेई छपियै बैठे दे आतंकवादिएं इस हमले च कोई नुकसान नेई होआ ऐ।

<><><><><><>

Khair Trees

मकामी करसानें गी समर्थन देने दे मकसद कन्नै ते केइ विधायकें आस्सेआ पुट्टी गेदी मंग दे परते च जम्मू कश्मीर सरकारै खैर बूहटें गी बड्डने दी इजाजत गी 31 मार्च 2025 तगर बध्वाई दित्ता ऐ। इस पैहलकदमी दा मकसद करसानें गी बाद्ध आमदनी उपलब्ध करोआना ऐ। खैर दे बूहटें दा आर्थिक मुल्ल होने दे कारण एह्दा इस्तेमाल दुआइयां, खाद्य ते होरने केई उद्योगें च कीता जंदा ऐं इस पैहलकदमी दा मकसद जंगलें दा टिकाऊ विकास गी जकीनी बनाना ऐ। जेह्दे च बूहटें गी बड्डने पर रोक लाना ते परतियै नमें सिरेया बूहटे लाने दी प्रक्रिया शामिल ऐ। इस फैसले कन्नै मकामी समुदायें गी अपनी आमदन दे जरियै च बाद्धा करने दा मौका थोग ते उंदा आर्थिक विकास जकीनी बनोग।

<><><><><><>

Farmers Ramban

राई-बाई च तब्दीली आहन्नने ते करसानें दी आजीविका च सुधार आस्तै राई-बाई आले मैहकमे नै रामबन जिले च केई पैहल करमियां शुरू कीतियां न। परंपरागत कृषि विकास योजना दे तैहत करसानें गी परंपरिक ज्ञान गी आधुनिक विज्ञान दे कन्नै मलांदे होई जैविक राई-बाई गी अपनाने आस्तै प्रोत्साहित कीता जा'रदा ऐ। एह योजना त्रऊं ब'रे च जैविक आदाने आस्तै 31 जहार फही हैक्टेयर प्रदान करदी ऐ। एह्दे अलावा कुदरती राई-बाई पर राष्ट्री मिशन कुदरती राई-बाई आली किट खरीदने आस्तै 1248 रुपें दी सब्सिडी बी दिंदा ऐ। जिला प्रशासन टिकाऊ ते लाभदायक राई-बाई आस्तै प्रतिबद्ध ऐ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” राहें इस बारी 23 फरवरी गी देश विदेश च रौह्ते आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 119मीं किश्त होग। कार्यक्रम च शामिल करने लेई लोक अपने बचार ते सुझाह 21 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार डल ळवअ ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौह्ग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग।

<><><><><><>

IPL 2025

बीसीसीआई नै घोषणा कीती ऐ जे आईपीएल 2025 दा 18मां संस्करण 22 मार्च थमां शुरू होग। शङ्कल मूजब इस टी-20 क्रिकेट प्रतियोगिता दा पैहला मकाबला 22 मार्च गी कोलकाता दे ईडन गार्डन स्टेडियम च पिछली बारी दी जित्तू टीम कोलकाता नाईट राईडर्स ते रॉयल चैलेंजर्स बैंगलुरु बश्कार खेड्डेआ जाग। अगला मैच 23 मार्च गी सनराइजर्स हैदराबाद ते राजस्थान रॉयल बश्कार होग। इस बरे आला आईपीएल बी पिछले बरे आले लेखा गै ऐ जेहदे च 10टीमां हिस्सा लेंगन। इनें 10एं टीमें गी 5-5 दे 2 ग्रुपें च बंटेआ गेआ ऐ। ग्रुप-ए च न चेन्नई सुपर किंग्स, रॉयल चैलेंजर्स बैंगलुरु, पंजाब किंग्स, राजस्थान रॉयलस ते कोलकाता नाईट राईडर्स जिसलै के ग्रुप-बी रु मुंबई इंडियन्स, गुजरात टाइटन्स, दिल्ली कैपिटल्स, सनराइजर्स हैदराबाद ते लखनऊ सुपर जायंट्स शामिल न।

<><><><><><>